

地230.11
新刊

卷三:45

卷九十六

淮軍戰事編

平寇紀略上

卷九十七

淮軍戰事編

平寇紀略下



續修廬州府志

續修廬州府志卷九十六

花翎道銜江南安徽廬州府知府清泉黃 雲總修

淮軍戰事編

淮軍武功為

國宣勞翊贊

中興屢荷

綸褒干城之彥鄉里之豪括以人表志例兼包

平寇紀畧 上方畧平寇記王茂蔭奏議采輯為篇

咸豐三年十一月初十日

詔曰王茂蔭奏保本籍人員回省帶勇防勦一摺刑部郎中李

文安著准其回籍督率練勇協力防勦欽此先是文安官刑

續修廬州府志 卷九十六 平寇紀畧上

部以御史記名屢經引

見將嚮用矣其次子今相國李鴻章方以編修在籍帶團

練孤軍支拄適當廬郡初陷巡撫江公忠源殉節之後

兵事岌岌李氏父子鄉望素孚刑部公每有信函回里

輒勸諭鄉人先為思患預防之計是以合肥等處團練

整齊皆可用歛人王茂蔭時官戶部右侍郎夙稔其事

因據實上陳得蒙

俞旨十二月文安出京四年正月行至淮北地方土匪蜂起副

都御史袁甲三因奏留文安駐守臨淮募勇進勦搜捕

伏莽次第掃清遂通淮南之路二月安徽巡撫福濟咨

催赴廬帶練勦賊適道酋陳玉城大股由巢湖進犯合

肥文安自帶鄉勇數百名率團練張樹聲吳毓芬等擊
敗逆酋陳玉城於白石山下敘功奉

旨以知府用是爲淮淝將士立功之始旋以積勞卒於軍蒙
恩賜卹所部後從伯相鴻章平吳平捻名曰淮軍卓著戰功而
其端實自臨淮教練時基之

同治元年江蘇軍事亟江甯將軍巴棟阿廣西提督馮
子材守鎮江將軍都興阿駐揚州巡撫薛煥駐上海其
他郡縣多淪陷於賊

詔以欽差大臣兩江總督曾國藩所舉福建延建邵遺缺道李
鴻章率師進援鴻章起翰林咸豐三年奉

命隨侍郎呂賢基回籍團練二月到廬署撫周天爵邀至幕中

續修廬州府志

卷九十六

平寇紀畧上

二

後粵賊大股竄至運漕巡撫李嘉端奏派道員黃元吉
帶安勇八百名亳州知州李登洲帶鳳穎勇五百名與
鴻章所帶練勇張桂芳譚家保許德成等八百名同赴
巢縣東關防勦賊大股屢次撲東關鴻章同黃李等軍
大戰追賊出裕溪遂復運漕鎮論功於七月二十一日
奉

旨李鴻章着賞加六品藍翎九月廬城失陷巡撫江忠源殉難
十二月鴻章又率練勇進復含山縣城奉

旨賞加知府銜並換花翎四年鴻章父文安回籍辦理鄉團勦
賊獲勝時江甯將軍和春駐軍廬境鴻章奉派督帶練
勇隨都統鍾泰駐紮巢之北鄉下皋五月文安卒鴻章

聞訃奔喪賊大股倏至圍總兵吉順營數日鴻章聞警
星夜奔回和春撥黑龍江馬隊五百名川勇五百名與
鴻章統帶前赴下皋酣戰數日千總譚家餘陣亾遂解
賊圍鴻章力辭獎敘仍請回家終制經巡撫福濟奏明
於百日後出帶練勇勦賊是年冬鴻章帶練勇隨官軍
克復廬州城論功以道府記名五年復奏派辦理營務
同水師黃國堯等以新造水師入巢湖大獲勝仗論功
交軍機處專以道員記名六年隨帶練勇浦尙存李勝
等克東關要隘論功與克復巢縣併案請獎奉

旨加按察使司銜九年曾國藩招入幕府適都統伊興額奏派

鴻章幫辦淮北軍務經國藩奏留統帶湘勇同曾國荃

續修廬州府志

卷九十六

平寇紀畧上

三

在江西勦賊收復景德鎮鴻章聲明不敢仰邀議敘尋
奉

旨簡放福建延建邵遺缺道仍留曾營至是曾國藩密言其才
可大用宜統水陸東征遂率陸師十一營乘輪船先下
既至營上海城南淮軍立營悉循楚軍營制營五百人
壘高浚深士卒日夕數操出入有法度吳民以爲創見
四月初十日奉

詔以鴻章署江蘇巡撫是時賊方由九洑州渡江犯揚州甚急
朝旨以鎮江爲南北要衝屢下

詔促巡撫往鎮江會都興阿之師勦賊鴻章既具疏謝因覆疏
略言黃翼升淮揚水師四千人協勦東西梁山尙無下

駛準期屢接督臣曾國藩書以兵勇訓練未熟人數未
齊不宜出戰臣從曾國藩討論軍事數年見其選將練
兵艱苦經營不期速效及來上海接見外國兵官亦言
其國練兵必須半年乃可使戰江南大營平素絕不操
練兵勇習氣最深鎮滬各防皆沿此弊臣在上海恐未
卽有化弱爲強之效臣往鎮江亦未必無一傅眾咻之
虞臣甫經接任一切尙未措手固未容舍此他去職分
所在不敢畏難當詳加簡閱選汰如兩三月間整理就
緒付託有人然後出江周歷北岸以達於鎮可無內顧
之憂又言揚防賊已漸退俟水師下駛當留數營於裏
下河各口以固江防若臣移駐鎮江則當會同都興阿

互相援應合力掃蕩臣才力庸弱本不敢居統轄南北
之名兵數單寡暫無以備分援各路之用伏乞鑒臣愚
悃期以歲時俾成勁旅鴻章十五日受事卽令參將程
學啟勝嗣武都司銜千總劉銘傳同知潘鼎新通判韓
正國以四千人進南匯縣周浦鎮爲北路而英法兵自
松江進金山衛爲南路相距百數十里新復之嘉定青
浦猶恃西兵與華爾常勝軍守之四月十九日英法兵
會常勝軍攻克奉賢縣南橋鎮二十二日復克柘林二
十三日奉賢令陳化鯤率民團收奉賢縣城程學啟等
亦於二十二日疊毀杭頭新場賊壘追賊至南匯城是
時西兵方議直趨金山衛適李慶琛覆軍太倉嘉定青

浦寶山同時大警英提督何伯請撤二國全軍回援而移我周浦之軍屯南橋以扼浦東要隘鴻章親往周浦諭程學啟等移營而留劉銘傳潘鼎新一營以當南匯之賊二十日賊至寶山攻參將姜德營令總兵鞠耀乾水師及巴革總兵況文榜參將梁勝章率師馳援二十四日賊退吳淞得無恙別隊賊由婁塘繞攻嘉定城副將熊兆周會英法兵守之賊不得逞遂繞南翔黃渡圍絕我餉道值英提督何伯率兵至南翔賊以大隊相持仍圍攻嘉定而青浦縣城守事本華爾所部獨任之提標中營參將李恆嵩扼趙屯港及四港口賊酋陳炳文以大隊來犯本月二十日賊又於蔣胥浦舊青浦設浮

橋襲我後路恆嵩擊之先後失利二十一日恆嵩與參將林叢文游擊王玉林等退屯北簞山賊遂由重固犯青浦二十四日分五道犯北簞山恆嵩等退軍分屯塘橋泗涇廣富林賊攻青浦數日華爾始由浦東回城堅守松江府城亦戒嚴賊攻嘉定益急二十八日英法提督慌於賊眾遣隊突圍欲委城去副將熊兆周嘉定令李克勤止之不聽竟強挾各官以出初屯南翔次日返上海而嘉定復陷賊遂趨青浦松江五月初一日分道由北簞山鳳凰山出泗涇之前由方家窰過龍珠庵七堡出泗涇之後蔓延數十里駐守泗涇各營皆潰參將王玉林二千人守廣富林爲松江隘口亦退至松江北

門賊逼松江知府賈益謙叅將李恆嵩調塘橋守兵移
城南前提督曾秉忠以水師由青浦回援華爾亦馳至
會守其部常勝軍尙在青浦爲賊所困自泗涇軍潰賊
卽分趨虹橋漕河涇距上海二十里鴻章先因西兵之
撤知賊必圖犯上海初三日卽檄程學啟滕嗣武韓正
國等三千人由浦東南橋急歸扼守虹橋分青浦後路
賊勢初六日學啟敗賊漕河涇次日復與嗣武正國破
七堡賊營焚小渡口羅家橋賊卡卻泗涇援賊進營新
橋時浦東南滙踞賊吳建瀛劉玉林屢爲賊酋李秀城
養子所凌送款於周浦守將劉銘傳潘鼎新五月初一
日鼎新銘傳與南滙令鄧賢芬入城受降部署其眾卽

以銘傳攝南滙營都司予建瀛玉林方有才軍功頂戴
貢令自劾秀成養子方踞金山衛初二日遣僞將吉慶
元率賊萬餘犯南滙射手書僞示入城建瀛等擊御之
初四日復合川沙賊來犯銘傳督建瀛等固守而伏隊
伍城外夾擊之賊遁初五日遂收川沙廳城鴻章以建
瀛所部立六營玉林所部立二營隨鼎新銘傳分守之
浦東漸定賊圍松江旣急鴻章以松江扼浦東西之中
爲尤要地不可失自赴新橋令程學啟等時出師綴賊
屬華爾檄歸甯波防軍與賈益謙李恆嵩等嚴守伺隙
出擊華爾思往青浦而賊圍城數重不可救乃議棄青
浦十三日夜簡常勝軍之銳猝破天馬山賊營由砲路

突入青浦城盡焚米糧輜重軍船率隊伍死戰出與恆
嵩等竝力守松江賊旣圍二城復以大隊分屯廣富林
塘橋而厚集於泗涇以拒我軍距新橋營十餘里新橋
距上海又三十里中多港汊賊狃官軍難猝進方增壘
思久踞鴻章乃自督師擊賊十一日令程學啟滕嗣武
韓正國赴泗涇親率副將滕嗣林叅將張遇春守備吳
長慶同知張樹聲各營深夜疾行黎明學啟等逼賊卡
毀之餘賊遁入營斷橋以拒官軍繼至望賊連營三四
十里獲其謀者言僞忠逆及陳炳文郜雲官均聚焉乃
令遇春等誘賊前掣軍橋畔以劈山炮斃賊數百十九
日賊騎掠七堡鴻章於小渡口設伏令學啟以洋槍隊

百人越橋攻賊壘會大雨乃退師二十一日陳炳文郜
雲官以數萬人犯新橋分其眾爲十二支竄及法華鎮
徐家滙九里橋踰新橋十餘里勢且逼上海圍學啟營
填濠拔鹿角學啟以槍炮禦之不及則擲磚石擊賊尸
平濠將躡以登學啟手然劈山炮開壁門大呼出賊稍
卻復列陣前持竟日嗣武正國等營次第皆危急鴻章
自統七營六成隊往援遇賊徐家滙張遇春前突之賊
萬人扼橋拒遇春躍馬踰橋取黃衣賊賊稍傷遇春馬
遽蹶噪而前遇春躍起斫賊墮而上賊騎遇春子志邦
奮前斬賊首擲陣中賊乃駭退追之至新橋學啟等瞭
見旂幟奮呼出營夾擊斬級三千餘解脅從數千人獲

賊械數千件二十三日學啟嗣武正國等乘勝攻泗涇復破之毀其營數十廣富林塘橋之賊皆遁滬防肅清詔仍命鴻章赴鎮江助攻江甯鴻章覆疏密言臣接督臣曾國藩書頗以進攻金陵兵單爲虞曾國荃亦言官軍止能圍西南兩面深溝高壘以水師爲根本以江面爲糧路先自固以圖賊非增二萬餘人不能合圍臣查金陵城大而堅和春張國樑統師八九萬圍攻日久功敗垂成今蘇浙兩省徧地賊區粘連一片賊處處可進援尤與昔年情形迥異所恃楚師穩練較勝他軍賊數眾多未盡精悍曾國荃軍數不及二萬不足合圍卽未能制賊死命此次李秀城等撲犯松滬負創而遁聞將連合杭

湖賊眾赴救金陵臣急欲馳往鎮江就近援助無如原部陸軍僅數千人分兩處均不得力專一路則尙可自立兵事重大臣何敢易言之也滬中官民向恃洋人爲安危乃援賊未來之先洋人分兵四出援賊大至之後洋人斂兵不動臣揆度夷情似非暗與賊通坐觀成敗實係懾於賊眾不敢向前若非臣親督兵將痛挫凶鋒患且不測以是知洋人不可專恃滬防必須自強臣忝任蘇撫旣不能棄滬中每月二十萬餉源之地又不敢緩鎮江上下游接應之師左右思維實無長策至滬上原有水陸兵勇簡汰整頓非臣親自部署不能鈐制所帶諸將中尙有勇敢樸實之材實少應變馭眾之選且

資望皆淺未可令獨當一面臣斷不偏信吳中紳士之言貽誤大局惟軍事以得人心爲本臣之謏陋到滬後稍繫軍民之望未便輕自移動遽失眾心曾國藩處似亦無統兵大員可派來滬可否容臣將滬事辦妥移師出江抑臣更有言者馮子材等催臣前往實欲臣到鎮爲該軍籌餉未必爲進勦起見江北完善地方所出之餉專供都興阿一軍尙無缺乏而粵域已分江南止存鎮滬兩處每月僅能由滬分給三萬臣實深內愧馮子材尙能戰守而兵勇疲惰已非一日長江師船大半朽壞劫奪成風臣卽頓頽其間止能自立一軍未便控制諸將若輕言整頓先失和衷之義若親軍太少亦無整

頓之資此皆實在爲難情形臣不敢稍有徇隱疏入

詔緩鎮江之行初奉賢縣之復以兵單未及守仍爲賊踞五月

十一日潘鼎新劉銘傳令降將吳建瀛劉玉林攻復之鼎新銘傳進屯奉賢玉林屯柘林賊踞金山衛連營至浙江乍浦竝踞漕涇鎮二十八日鼎新等令玉林攻破漕涇賊追至衛城盡毀東北門外賊營金山界江浙爲浦東門戶鴻章趣鼎新等屯軍漕涇山海塘進東北檄華爾李恆嵩由張堰進西南而令叅將覃聯陞屯奉賢爲後路六月十四日鼎新等進南沙距金山十五里賊營海塘左海右河以阻師劉玉林方有才探水過河埂斃其酋十七日鼎新與把總徐道奎燬其營卡追至城

下南門突出賊二千餘搏戰鼎琛等力單而退值鼎新
銘傳率親兵至三陽察地勢猝遇賊然洋槍斃其魁始
卻令玉林移軍三陽十八日覃聯陞亦至南沙次日攻
城賊距於海塘守備陳德勝持矛刺賊腦中賊槍與俱
蹶聯陞亦傷而華爾恆嵩軍皆至營城下二十日鼎新
銘傳率玉林等進營東門華爾恆嵩巡城外二十一日
漏未盡玉林軍入城賊盡遁遂收金山衛鴻章令鼎新
銘傳聯陞以所部分駐要隘益以吳長慶一營吳建瀛
三營扼守之浦東既平上海松江皆大定鴻章請調翰
林院編修劉秉璋至軍提督黃翼升淮揚水師十營至
是方下駛以二營駐浦口四營分駐揚州三江營六月

初八日自統四營至上海七月令諸將圖青浦程學啟
韓正國滕嗣武進屯北簷山劉士奇郭松林屯塘橋鴻
章弟湖北知縣鶴章率兵往督之華爾李恆嵩自松江
來會初十日學啟攻西北門嗣武攻東門華爾恆嵩攻
南門十二日毀東北門外三賊卡十三日華爾增調常
勝軍攻城十四日夜學啟敗賊東北門十五日砲裂城
十餘丈軍士咸登城賊奪路思逸鶴章設伏西北門截
殺之追至白鶴江黃渡遂復青浦城學啟軍與翼升水
師駐焉偽慕王譚紹洸聞青浦復克恐官軍躡其後謀
於秀城召其黨偽會王蔡元隆偽堵王黃文金合嘉湖
蘇崑之賊十餘萬犯松滬西北二十日至青浦西門黃

翼升水師敗之二十五日繞趨北簞山滕嗣武韓正國
出擊值水師與鳳凰山塘橋駐軍至賊不得逞遂長驅
攻北新涇營北新涇接張官渡後達法華鎮實上海西
路之蔽鴻章先遣已革總兵況文榜熊兆周副將梁安
邦等統貴州常銳勇千八百人駐其地二十六日文榜
伺賊至設伏張官渡賊遇之卽退二十七日賊逾河我
軍復擊退之二十八日遣張遇春劉玉林等往勦玉林
入賊隊手擒十餘人斬二酋懸馬後逐賊槍中右股而
墜其下馳救之扶騎者三馬陷淖不得出賊環刺之死
遇春等乃收隊賊遂圍北新涇分隊擾法華以西距上
海十餘里八月初一日鴻章令遇春嚴陣法華左右副

將王東華水師由洋涇濱過曹家渡毀賊浮橋賊屯兩
岸東華以鎗砲環斃數百復揮眾登岸殺賊遇春由陸
應之賊始不得進而圍北新涇賊以草填濠欲過擲火
藥焚其草死濠中者相藉初二日攻益急饋糧藥且不
得達時駐上海者張遇春等六營止三千餘皆分防百
里內外賊旦夕犯上海鴻章飛檄劉銘傳吳建瀛由金
山衛華爾由松江倍道來援密飭弟鶴章約程學啟諸
軍以半隊留守而率半隊急趨泗涇七堡出賊後咸聽
學啟調度鴻章親督上海之軍期學啟初三日會戰北
新涇先一日漏將盡學啟等間道裹糧至七堡譚紹洸
已遣賊踞七堡學啟分十營橫列街南北紹洸率眾三

萬圍學啟軍數重往來馳突甚銳官軍堅立伺賊稍懈
乃發槍砲死無算韓正國突賊陣槍子貫右足脅股亦
受賊矛仍裹創進滕嗣武郭松林周盛波張樹珊張桂
芳等咸苦戰學啟往來督之賊大潰追殺十餘里日暮
我軍屯七堡紹洸走野鷄墩復與蔡黃逆眾圍北新涇
翌日鴻章督軍至虹橋賊方憑河據壘伏左右以待鴻
章策騎旁馳疾過之與學啟等遇北新涇令上海軍分
道擊賊學啟嗣武松林已入文榜等營軍中望鴻章旂
幟咸謹呼出夾擊盡毀賊營十餘賊遁吳淞江北仍阻
大河列陣黃翼升自青浦至督王東華等水師由吳淞
江乘潮入夜大風雨發砲斃賊數百復毀其北岸營七

賊始退初四日偵知我軍皆回防復犯北新涇值劉銘
傳吳建瀛之軍由浦東至敗之於野鷄墩徐家滙初五
日追至南翔賊遁嘉定滬防復肅清閏八月鴻章疏陳
松滬近日軍情因言偽忠逆輔逆各股援賊麇集甯廣
太平鮑超及曾國荃之師皆困於疫未知戰事若何極
爲焦慮臣軍自夏徂秋奔馳苦戰積受穢濕病者亦十
六七死囚甚眾現金金山衛張堰各營專防浦東以當平
湖乍浦之賊青浦塘橋虹橋北新涇各營專防浦西以
當崑山嘉定之賊署提臣黃翼升水師分泊澱山湖泖
湖兼防蘇州嘉興之賊目前分防各處兵單甚覺可虞
將來進規蘇州人少更不濟事現仍派員赴皖添募十

營並商曾國藩督催總兵李朝斌募造太湖水師駛至
松滬會剿然非三四月不能集事疏入報聞時上游賊
窺鎮江欲越鮎魚套竄金山竝由炭渚柿葉洲出江圖
北犯

詔下都興阿馮子材備之旋敗句容寶堰賊於湯岡滬軍已克
青浦賊尙踞嘉定英將何伯將受代歸約鴻章會攻嘉
定閏八月二十八日合英國兵千八百人法國兵四百
人竝遣三品頂戴白齊文叅將李恆嵩率常勝軍千五
百人英法教練勇會防局砲勇千人李鶴章督四營與
況文榜熊兆周梁安邦梁勝章繼進中途毀賊卡九月
初一日抵嘉定初二日何伯令西兵築砲臺然炸砲日

將午南城傾賊由西門奪路走遂克嘉定城並敗太倉
援賊令況文榜等駐之塘橋虹橋軍進屯南翔程學啟
屯黃渡黃翼升水師二營扼崑山大河以爲守嘉定旣
克譚紹洸陳炳文復糾蘇杭嘉興賊十餘萬分道自崑
山太倉來犯北由蟠龍鎮至四江口圖踞黃渡以當青
浦南由安亭至方泰鎮圖入南翔以絕我嘉定之援九
月十二三日賊逼南翔十五日李鶴章敗賊陸家行郭
松林敗賊方泰鎮賊先於初七日犯四江口叅將劉士
奇游擊鄭國魁軍焉士奇等迎擊之程學啟由黃渡來
援賊少卻益由蘇州掠船千餘艘水陸七八萬人竝進
水師叅將宋有勝等晝夜與之持十四日賊於三江口

四江口立五大營設浮橋乘夜潛渡士奇國魁及張光泰鄭國榜水師皆爲所困十五日學啟等往援賊勢厚擊之不散砲子貫士奇右耳仍固守而青浦西北之洋新涇趙屯橋白鶴江賊益蔓延擾及重固鎮張堰距青浦十餘里十六日黃翼升督水師由青浦出衝賊將至白鶴江賊二萬人扼隘口哨官周再升死焉河小堤高不得進士奇國魁等營援絕賊連營數十里大河支港俱設浮橋遂犯黃渡十七日李鶴章由江橋至黃渡會學啟等分道進擊賊陣南岸學啟松林逾橋敗之十八日賊築卡於我所過橋以阻師我軍乃循北岸進十九日賊犯我左學啟令張桂芳周盛波擊之復分隊繞我

右郭松林張樹珊擊其半渡而賊勢乍合各軍猛擊斷其隊乃敗之追至安亭河紹洸親率大隊出拒潛以數百人逾河乘我後學啟抽隊殲其眾賊仍歸南岸兩日斃賊數千我軍亦傷亾數百黃翼升令成俞卿宋有勝等師船勦杜村自督舢板勦洋新涇八字橋賊守趙屯港鴻章以四江口營久被圍猝不得破賊乃檄劉銘傳由浦東張堰吳建瀛由南翔來會白齊文常勝軍由松江逕起重固截賊而約黃翼升師船進趙屯港自率教練洋槍隊七百二十日至江橋益檄促諸軍二十一日至黃渡時紹洸部賊屯吳淞江北經挫衄少衰陳炳文與僞將鄧光明數萬人踞南岸多洋槍健衝突河汊要

口皆據之鴻章勵諸將詰朝會戰二十二日令程學啟
劉銘傳郭松林各率六營之眾銘傳當其中學啟當其
右松林當其左自辰至未不克望賊旂益無際鴻章督
戰益急松林銘傳皆逼賊營拔籤逾濠伏而前斃數黃
衣賊酋賊少動乃冒煙直入各毀其前二營右隊賊回
救砲子傷學啟胸見賊旂方掣退裹創疾前與陳飛熊
吳建瀛以二千人然洋槍急擊賊由南岸潰而北我軍
三路掩殺之四江口圍始解士奇國魁光泰等皆出循
河殺賊賊復退崑山常勝軍由杜村破白鶴江賊營黃
翼升水師由趙屯橋截擊潰賊追至三江口燬其浮橋
石卡殆盡滬防三次肅清奏入

續修廬州府志

卷九十六

平寇紀略上

五

優詔以李鴻章補江蘇巡撫總兵程學啟遇缺提奏竝加提督
銜餘各陞賞有差旋有

詔詢李鶴章功與程學啟埒應與獎鴻章爲疏謝竝辭

詔命擢知州加四品銜是役也獲賊械數千斃賊萬餘僞將以
下賊目數百毀賊營數十賊自是不敢復窺松滬常熟
守城僞將錢桂仁駱國忠董正勤與太倉賊將錢壽仁
密約送款於親兵水師游擊周興隆永昌練首候選道
徐佩瑗素與賊習與其謀鴻章遣弟鶴章與期內應以
臘月朔水陸分攻二城十一月二十二日李秀成自金
陵還蘇州桂仁託往謁覘之國忠恐潛白周興隆二十
八日夜飲桂仁黨就座斫殺錢嘉仁姚得時並誘殺桂

仁之眾舉城獲髮降分守四門令其下余拔羣潘金旺
率眾約福山賊胡經元江勝海殺粵賊以降比至則福
山已固守炮艇環列二十九日興隆國忠復以千二百
人往令金旺國孝攻其南而興隆等繞斷其北入江之
道拔羣於江中然砲擊賊營初一日國忠以洋槍斃偽
將侯得龍於鷓首竝殪謝有成賊大潰經元勝海倒戈
出毀其營殺粵賊殆盡許浦白茅徐六涇諸海口竟日
皆下李鶴章程學啟先於潘鎮望仙橋駐隊綴崑山之
賊而自率各營進太倉五里墩渡河毀其卡復進毀南
馬頭石橋賊營薄太倉城隔河以陳風雪猝至罷還而
是日周興隆遣董正勤吳超凡率千人由常熟抵太倉

之支塘中伏敗歸錢壽仁知事洩率所部二千人脫出
至上海降復姓名周壽昌鴻章命其屯於黃渡常熟逼
蘇城秀成乃悉眾爭常熟官軍分守嘉定青浦中阻崑
山太倉不能應新募皖中軍又爲曾國藩所留未得下
無兵力圖崑太因檄福山鎮鞠耀乾會副將黃登第艇
師駛泊福山徐六涇通海口爲聲援而令興隆國忠等
自守練首徐佩璠馬安瀾屢以團勇敗賊初六日賊悉
銳以出團勇潰遂逼常熟城而江陰無錫賊皆至謀者
歸言僞忠逆等四大酋將六七萬眾期必破常熟鴻章
檄常勝軍五百名由松江乘輪船至福山易船進口從
國忠請也十七日至福山則楊舍賊已踞之耀乾登第

師船初與賊持爲颶風所擊移北岸福山復陷常勝軍不得渡折歸鴻章約提督黃翼升統淮揚水師三營出海赴之而令編修劉秉璋仍督常勝軍會各師船往期奪其隘分陸師急擊崑太十七日程學啟以八營進望仙橋安亭郭松林以八營進太倉南外岡鎮二十一日學啟敗崑山賊於蟠龍鎮李鶴章亦率五營由嘉定進復檄副將姜德進六渡橋梁安邦梁勝章進婁塘鎮奧倫李恆嵩以常勝軍會攻太倉二十五日抵外岡令常勝軍移炸砲攻南門鶴章松林軍護之學啟出太倉西以截崑賊況文榜姜德等出其東備城賊襲我後二十七日學啟復敗賊蟠龍鎮遂屯其處鶴章松林會常勝

續修廬州府志

卷九十六

平寇紀略上

十七

軍至南馬頭炸砲破其壘渡河據之東南北三門賊皆出擊之卻二十八日炸砲裂城數丈常勝軍先登各軍繼之賊洋槍發如雨浮橋猝斷軍亂爲賊所乘常勝軍死數百松林禦之以退師然氣大沮次日與倫遽以其軍歸松江其赴福山者二十四日乘師船進口憑江岸廟爲營鑿牆然砲與賊隔水拒三日不得進仍撤歸翼升水師亦以颶風壞數十船翼升屢覆於水遂移旋常熟援益絕

詔以鴻章兼五口通商大臣僞忠逆李秀成方以礮船二百艘赴常熟穴地攻城鴻章遣謀密書諭常熟死守而檄浦東潘鼎新劉銘傳張樹珊以三千人乘輪船赴福山劉

秉璋張遇春會督之十三日至福山將與黃翼升水師
竝登阻風雨不得泊十八九日始濟師西洋港二十一
日鼎新出隊同觀山北遇僞聽逆之眾戰不利千總袁
定邦死之二十三日樹珊移營蘆浦港西銘傳營其南
跨海塘爲壘二十四日鼎新亦移營蘆浦港兩岸壘未
就而賊至銘傳樹珊擊卻之鴻章初以福山背水而軍
兵單無退地不可無援復檄常勝軍往二月初四日李
恆嵩以千人至鼎新樹珊移逼賊營初五日常勝軍然
礮擊賊城賊來援欲登同觀山窺我後路銘傳擊敗之
而鶴章學啟等進攻崑太初一日學啟築石卡蓬萊鎮
以扼要道初二日進探地勢遇賊敗之追至太倉西門

初三日復擊賊萊葭濱追至青陽港距崑山三里是時
賊攻常熟益急雲梯地道皆具屢拒屢進戈登領常勝
軍方奉令益購洋槍礮往福山十五日銘傳進王家橋
賊適由小市橋窺西路敗之而戈登亦至十七日鼎新
秉璋約戈登以大礮攻賊壘而各軍專擊援賊選勇士
攀城十八日翼升水師登岸令總兵王東華周國興列
隊山後銘傳鼎新伏同觀山左右以小隊誘敵樹珊列
隊毛家山前常勝軍設大礮於福山舊城之巔旁列小
炮盡然之呂宋兵乘小舟薄賊壘駕浮橋死士伏城牆
下日中港東西賊營皆破緣牆入斫之而謝家橋大義
橋小市橋賊傾巢出分道援福山官軍亦分禦之人人

殊死戰賊不能當而退始奪福山石城乘夜復選銳攜火器四出襲之盡毀其營先是圍常熟城之賊以福山警多赴救止留黑旗賊數千攻城十六日周興隆等夜出襲毀賊二十餘卡十九日登城見賊入西山而福山火起知援軍已破福山乃開四門悉銳出福山軍亦進而合攻附城賊無鬪志始盡潰擒賊首朱衣黠翼升秉璋鼎新銘傳等水陸咸至圍乃解常昭一孤城圍賊中堅守七十餘日奏入

優詔獎守城功太倉踞賊蔡元濬僞遣人乞降期於三月初九日迎師李鶴章與程學啟率師往嚴陳待之鶴章軍已渡河將入城東南門各出賊數千裹白巾乍變伏賊盡

起軍急退亾數百人鶴章傷足學啟方扼西門猝見賊舟數十自崑山來城賊與語甚曠疑而爲備賊果出犯學啟奮擊卻之十一日復犯婁塘前敵營副將梁安邦擊走之鴻章得報檄戈登李恆嵩常勝軍赴攻令劉秉璋馳往助鶴章十二日學啟以三營並調歐陽利見水師進逼西門常勝軍毀南賊卡十四日賊李文熙率船截河口學啟以洋槍隊襲其後而自督水陸迎之賊不能遁殲焉竝敗城中援賊戈登列大砲學啟營前毀二石壘十五日鶴章軍南門防竄賊環城發炸砲日將哺城裂緣而進賊走南門不得出捕斬幾盡遂復太倉州城太倉旣克郭松林等復破茜涇支塘之賊程學啟偕

戈登進崑山賊守之甚固攻兩日不下戈登以常勝軍暫歸松江學啟所部留屯東門鴻章由上海往太倉視守具復至崑山觀學啟軍歷婁江青陽江吳淞江察水師戰道經青浦至松江令戈登繕攻具赴崑山會勦是時常州賊僞護逆陳坤書圖犯江陰福山劉銘傳截敗之嘉興賊僞聽逆陳炳文圖竄章練塘洙涇亦爲曾敏行等師船擊退四月初一日程學啟令劉士奇移屯崑山北門月河橋自率隊敗賊於更樓橋周市令周良才扼駐其處初二日敗賊北門初三日學啟以炸炮攻城不克賊由南門襲我後學啟揮軍斬賊數百賊目譚紹洸陸順德復以蘇城悍賊數萬撲太倉而援崑山初七

日崑山賊由南門出繞東門至青陽江學啟列隊綴之而令水師隔河力擊賊復由北門犯士奇營陳有昇宋有勝何安泰等擊敗之初八日周良才王永勝敗周市更樓橋竄賊初九日水陸合敗南北門賊而李鶴章在太倉布守分九營駐毛家橋杜家橋雙鳳鎮爲犄角初七日雙鳳營未定賊大至圍營周盛波憑牆固守別遣隊伏賊後而令孔昭佑周盛傳出前營夾擊之敗歸周市初八日僞來逆犯前營盛波築砲臺營中擊賊賊分隊圍副營盛波令昭佑盛傳出左右而自擊其中賊不能禦奪路遁鶴章先遣吳建瀛劉超廷伏兵中道截殺之合追至鴛鴦橋初九日僞渠譚紹洸等由雙鳳北設

浮橋逾河圍前營盛波內外合擊孫善成以水師助自朝至午斷其橋始退賊分圍副營昭佑禦之吳建瀛顏邦桂伏援師動賊隊盛傳昭佑突而前賊乃敗鶴章分遣余思樞衛汝忠敗賊於大廟河川橋黃中元何映文敗賊於季家灣沙溪鎮次日盛傳昭佑復追賊直塘以西賊遁歸崑山連營北門外十一日學啟令周良才率四營襲賊後至更樓橋符信劉士奇分左右翼進自督親兵繼之先擊敗伏賊戈登亦至以炸砲助攻竟日破賊二十四營殺賊逾萬賊氣奪戈登銳攻城學啟謂崑山西南北有陽澄湖青陽江巴城湖皆格於大水由陸通蘇城必道正義鎮舊有四賊營蘇州援賊屯焉我奪

而據之絕其援而斷其竄路賊膽墮破之易且殲其眾十二日與戈登乘輪船繞赴正義視之砲斃賊數百十三日學啟約郭松林等水陸師達正義殺賊三千餘戈登常勝軍繼至賊盡潰令陳有昇宋有勝屯焉偽慕逆譚紹洸聞已斷正義以四萬賊出爭併力敗之復令郭松林滕嗣武與水師三營扼隘口周良才王永勝鄭國魁屯扼北門橋何安泰龔生陽張志邦立隊東門竟夜不撤而自督親兵當正義大道日已暮紹洸統悍賊由小西門出伏軍盡起不得逞水師環擊之積尸斷流旣折歸復出東門敗如前乃入城以砲拒學啟命所部攻十四日黎明遂克崑山新陽縣城獲偽將夏天義先後

擒賊七千餘斃賊三萬而譚紹洸仍從陽澄湖遁去自
崑山之捷鴻章益奇程學啟將才所至聽自爲進止江
陰縣楊舍汛居蘇常之交距常熟江陰縣各五六十里
沿江有城悍賊二千人踞之以蔽江陰無錫賊目陳坤
書方由常州竄江陰窺江北以牽我師賊目黃子澐亦
由無錫犯常熟西境福山常昭諸軍屢雕勦獲勝乃議
取楊舍四月初八日劉銘傳以三營進屯鹿苑黃翼升
以水師駐江濱十五日子澐遣賊來援坤書踞西唐市
銘傳聞克崑山知東北可無慮全移所部屯鹿苑十六
日乘霧至楊舍賊開東門出守備唐金洲楊士江擊敗
之十七日銘傳復視賊西唐市十八日以二營屯楊舍

二里外翼升水師由夏橋港敗江陰賊十九日以三營
近楊舍城夜劉盛藻潛營東北隅設大砲二十日前營
逼東門水師敗江陰援賊復以一營夜逼其濠二十一
日遂然炸砲擊賊毀其砲臺賊懼夜出走水師賴榮光
彭楚文擊之返二十二日乃合圍炸砲壞城數丈盛藻
解衣踰河揮其下設雲梯賊李天得劉泰生以洋槍百
人抵城缺軍士頗傷亾盛藻蔽板以登銘傳趣隊益急
賴榮光等亦破西門進遂克楊舍汛城南濶北濶西塘
市賊聞之皆遁四月程學啟所部進屯峴子山大小唯
亭角直五月初復移屯外跨塘日徧蘇州李鶴章在常
熟編駱國忠降眾爲八營加訓練竝督各軍進屯常熟

西三十里之王莊鴻章疏陳大勢布置備言臣密察賊情盱衡地勢有可慮者三可幸者三蘇常杭嘉爲東南財賦最盛之區逆眾占踞四年徵糧收稅取精用宏恃以接濟金陵轉輸各路必死守而力爭之以成犄角之勢以護糧餉之源可慮者一也江南多水蘇嘉各郡尤甚湖河蕩港千百通聯津路迷離橋梁斷續戰船有不能徧及之處陸軍多望洋而歎之時我難進而賊易守不比中原四戰之地山川瘠苦之邦克一名城餘賊無所繫戀望風而走卽如前此常熟解圍太倉迭克蘇嘉之賊非不膽寒然猶圖死抗蓋險足自固而利不肯棄臣由松滬進兵爲蘇省偏隅嘉興對面蘇嘉竝圖則無

此兵力舍嘉圖蘇則動輒牽制可慮者二也僞忠逆李秀成爲諸賊之冠不甚耐戰而最多狡謀據有蘇杭嘉湖四郡之地各僞逆皆其死黨悉聽指揮咸豐十年圖解金陵長圍而繞竄浙江以取遠勢十一年圖救安慶而繞竄江西湖北以取遠勢去年迄今復救金陵而分竄皖南北又欲竄揚州裏下河以取遠勢茲我軍進逼蘇州仍徘徊金陵上下不卽回顧但遣其心腹黨羽分守蘇嘉我果攻急或挈眾來援或別圖竄踞均在意中可慮者三也惟是江皖浙東各有重兵堵截又赤地千里無所掠食聞鮑超與曾國荃所遣各軍累復巢縣含和已追至江浦浦口其竄天長揚州者人數雖多饑疲

實甚都興阿吳棠等果能竭力守禦不使竄入裏下河
鮑超等再連克二浦斷北賊過江之路則各軍分投勦
辦較易收拾可幸者一也李秀成李世賢白分踞蘇浙
氣勢日盛近歲以來乃復屢挫各路損傷不下數十萬
精銳大減官軍攻下數十城膏腴亦去其半惟嘉興陳
炳文部賊較多而悍有蔣益澧扼其前臣軍綴其後至
常州無錫直接金陵東鬪賊援甚廣深入頗難但使我
軍穩守穩進得寸得尺毋再失機徐圖制賊可幸者二
也臣軍水陸添募及收撫各城降眾已踰四萬督臣曾
國藩以蘇郡可圖太湖可進又令處州鎮總兵李朝斌
統率太湖水師十營尅日下駛協力攻勦今擬酌分三

路以勦爲堵由崑山進蘇州爲一路程學啟所部陸軍
當之由常熟進江陰無錫爲一路李鶴章劉銘傳所部
陸軍當之署提督黃翼升督淮揚水師往來調度相輔
並進戈登常勝軍移駐崑山專備各路游擊援應由泖
澱湖進吳江平望太湖爲一路則李朝斌水師當之以
上三路皆欲規取遠勢以翦蘇州枝葉而後圖其本根
也又恐分路並進杭嘉湖各賊繞竄浦東窺撲松滬復
令常鎮道潘鼎新所部八營扼金山衛編修劉秉璋所
部七營扼涑涇副將楊鼎勛所部五營扼張堰聯爲一
氣以防內竄俟浙軍得手卽相機前後夾擊以固全局
而慰

聖塵疏八

詔嘉鴻章所籌周至五月十四五等日江陰賊犯楊舍劉銘傳
擊敗之而賊渠林紹華陳坤書李世賢自無錫城至江
陰顧山連營出犯李秀成已渡江至無錫合五偽酋水
陸數十萬冀援江陰竄常熟李鶴章與黃翼升劉銘傳
謀宜乘賊未定痛創之賊北自北溇南至張涇橋東自
陳市西至長壽爲石營土營石木卡百數十咸憑河扼
險毀橋梁泊砲船勢大熾二十日鶴章議以銘傳七營
之眾并三營進北溇攻其左郭松林吳建瀛黃中元所
部八營并三營進南溇攻其右滕嗣武張樹聲周盛波
所部八營并三營進麥市橋爲中路翼升水師三營分

續修廬州府志

卷九十六

平寇紀畧上

三五

助之周壽昌黃金志由嚴家橋進張涇備無錫援賊鄧
長里張學仕水師先破吳塔羊尖賊營仍堵其隘以截
蘇州蠡口援賊鶴章自率馬隊列陣顧山應之二十一
日松林軍敗賊陳市銘傳令副將者貴擊走常州賊於
華墅二十二日銘傳嗣武軍焚賊砲船於北溇麥市橋
濠壘俱就鶴章登顧山吹角趣諸軍賊勢厚軍士多傷
亾戰久未逞無錫賊由張涇緱山羊尖大至鶴章望見
之恐壽昌軍不敵遣馬隊敗之嚴家橋賊退屯長涇鶴
章翼升因令中右軍大隊伏河岸僞將潛渡而水淺急
進南溇焚賊船松林乘間越南溇趨長涇賊大駭叅將
張林錦游擊李長樂率眾奮攻之林錦陣亾松林長樂

戴板揮刀盪賊陣血染衣盡赤賊乃潰追之至祝塘而北溷賊援長涇斷我歸路建瀛中元之軍敗之時酷暑將士渴且饑乃罷戰夜鶴章翼升赴陳市約銘傳諸軍攜板攜柴潛設浮橋發種種火器擾賊營而伏大隊隘口殺賊賊大亂水陸軍噪而進聲震天銘傳軍破北溷賊營二十七嗣武等軍破麥市橋賊營二十三松林等軍破南溷賊營三十五殺賊數萬二十三日江陰無錫賊由跨塘橋長涇西陳家橋分道至與敗賊合尙十餘萬鶴章令諸軍以小隊衝賊中堅而大隊圍之賊內怯旋敗劉銘傳軍追及八字尖松林等軍及祝塘長壽嗣武等軍及三巴橋復斃賊各數千毀其營數十擒僞王

宗朝將以下百餘酋獲賊馬五百船三十艘僞印二百顆軍械無算自顧山以西賊皆盡李鶴章還常熟銘傳仍駐楊舍而翼升水師駐大河越數日丹陽賊僞董逆江陰僞廣逆復沿江竄石塍陳坤書由常州再糾悍目率眾萬人三十日回據華墅六月初一日江陰賊焚掠至泗港常州賊犯沙山俱迫楊舍銘傳堅壁勿出以馬隊游擊獲賊諜知師期初三日賊果由沙山龜山逼楊舍城泗港賊爲龍玉鱗水師所截銘傳設伏迎勦賊亦僞敗至沙山突反鬪山谷中出賊數千銘傳之伏發擒獯酋及其眾賊退屯泗港沙山初四日別股賊犯顧山北溷西塘市初五日犯楊舍銘傳皆擊走之陳坤書欲

歸常州江陰賊許饋糧萬石期七日破楊舍銘傳請援於鶴章而股賊方擾長涇綴王莊大河之軍鶴章議先勦敗之乃赴援初八日賊由龜山西南分隊逼楊舍羣賊退屯沙山坤書眾獨留唐殿魁以死士百人襲之焚其二卡大驚擾逐之山口遂竄黃塘初九日翼升復令大河軍襲賊毀十餘壘斃無算賊遁祝塘青陽港鶴章所遣軍初敗賊於顧山陳市嚴家橋賊退羊尖於七里橋築堅卡令郭松林黃中元等擊之王東華水師亦至砲毀其牆復蹙之浮橋溺者尤多餘遁黃土塘楊舍解嚴鴻章將圖蘇州初議俟李朝斌太湖水師進吳江絕嘉湖援賊以朝斌水師多傷亾待募補乃專屬程學啟

六月十一日學啟以水陸十三營與戈登李恆嵩常勝軍乘船至九里湖距吳江之花涇港同里均十餘里留三營扼湖口備同里而自督各軍會戈登取花涇港十二日至夾浦夾浦者吳淞泖澱諸水入太湖口也賊砲船數十守石壘學啟令水師列陣陸師登岸護炸炮擊賊壘蘇州賊自寶帶橋來援敗之又敗吳江援賊追之尹山橋敗同里援賊留劉士奇王永勝與常勝軍駐守同里十三日學啟水陸由同里湖九里湖進賊設伏湖口列大炮於船爲拒水師張翼前陸師登岸發炸砲中其巨酋賊遂亂乘之毀六營七卡斃賊三千餘擒五百餘人是日蘇州賊水陸萬餘由尹山橋圍攻花涇港營

學啟留水師二營守龐山湖口陸師二營守同里鎮自
率水陸馳救賊不意我克同里之速士奇永勝奮出夾
擊乃引遁士奇弟士珂歿於陣而士奇與陳忠德皆負
重創方學啟之攻同里也戈登恆嵩知吳江賊必不備
常勝軍遽逼北門毀賊卡砲船出龐山湖遇同里敗賊
盡獲其船殲其眾於是城外賊俱盡十四日整隊至城
根守城賊嘉酋開門降學啟戈登受之遂收吳江震澤
縣城吳江既定學啟督四營籌吳江城守嘉興賊偽榮
逆廖發受水陸數萬竝犯南門學啟率眾登陴陰選洋
槍隊千人集砲船二十出擊何安泰朱寶元由城左小
徑伏行出賊後彭玉貴等以炸砲迎擊之砲船截其中

道賊遽潰學啟開門出掩殺之至平望吳江南達嘉興
北接蘇州西連太湖皆賊窟學啟令阮炳福水師兩營
扼城南萬頃橋當嘉興陳友昇兩營扼城西北夾浦口
張光泰水師護之當蘇州何安泰張志邦兩營駐城中
爲固守計而自歸唯亭舊營兼顧蘇崑蘇嘉賊四出遠
犯夾浦攜外國流氓發小炸砲相擾友昇光泰屢擊卻
之鴻章乃嚴檄各國領事禁洋人濟賊二十三日賊由
平望犯北庫梅家渡直趨同里後路水師禦之二十四
日復犯同里陳東友扼龐山湖賊不得前別股賊犯吳
江東門安泰敗之夜北庫新湖賊犯湯家橋東友師船
由夾槎湖進擊戰至曉賊集愈眾突犯長生橋水師不

支賊遂入同里數日始擊退二十九日安泰志邦出勦賊追至平望時李朝斌太湖水師已至四營鴻章聞賊踞同里恐吳江糧路絕卽遣往助七月初五日朝斌全軍抵滬鴻章將與出巡蘇浙間水道並令劉銘傳等攻江陰劉秉璋等圖嘉善以分賊勢先後進軍學啟由唯亭至吳江與太湖水師會夾浦口知陸路賊漸敗退而太湖賊船如綫蘇浙往來無阻初六日督師船百艘槍隊八百人進盡下沿湖賊卡湖濱大缺口賊立兩營一卡距東洞庭山九里爲蘇嘉賊津渡初七日學啟令謝梁鎮引師船列蘆葦中陸師涉水以登親軍設炸炮當中路陳友昇何安泰張志邦槍隊守之太湖水師四營

分攻其東西歐陽利見截賊後東山賊二千來援利見先敗之攻竟日不下學啟謂賊營如鳥翼宜先破其北岸遣友昇等率死士五百越水夜襲之初八日黎明毀其石牆踰濠上利見扼飛虹橋梁鎮斷其浮橋賊不得遁其酋以下皆就戮南岸賊亦潰追之至東山斃賊數千學啟次日歸唯亭旋督所部十營進屯蘇州外跨塘鳳皇頸唐家濱水師進金雞湖獨池湖大牛橋洋澄後湖以逼婁葑兩門而令太湖水師李助發等泊防南舍

鎮

